

Fundacion Accion Ambiental:

Destruccion y daño grandi riba baranca na Sero Colorado

ORANJESTAD – Fundacion Accion Ambiental ta condena totalmente e daño grandi cu a wordo haci ariba e baranca panort di Baby Beach, na unda a rosa y destrui tur e cuebanan cu ta pasa bou di e baranca. E cuebanan cu ta pertenece na e cueba di mas grandi di Aruba, Corsou y Boneiro, cu ta wordo yama cueba di Bursons of Lago Colony Caves.

E cueba aki tin dos hala cu ta wordo separa pa un cavernia masha bunita, net patras di un cas na Colony. Pa drenta tin un porta y un muraya berde grandi. Net na e cavernia ta baha cu un trapi pa asina bay pa e cueba panort, cu ta esun grandi y pazuid esun cu ta pasa bou di e casnan band'i pazuid y yega ariba e tereno unda nan kier traha e hotel sigui bay ariba y su salida ta pabou, unda a traha e caminda nobo di santo mas pariba di e tereno esta na final di e baranca band'i pariba. Esunnan cu no conoce e area y e cuebanan no sa con e ta core.

Mientras e tunnel di awa Mangel Cora Well tambe ta pasa banda di dje.

Fundacion Accion Ambiental a haci investigacion di e area aki y a marca cada parti di e cuebanan y tunnel di awa, unda a haya piedranan di coral di miles di aña na e sitio. Nos a tuma muestra di

esakinan, pa cual nos tin nan pa prueba. Nos a saca potret di tur e cuebanan y marca cada sitio di e cuebanan via di nos GPS; tambe nos a filma esakinan pa registra y archiva esakinan profesionalmente.

Tambe ariba pagina di Facebook di Fundacion Accion Ambiental nos a publica tur e potretnan di e cuebanan, tunnel di awa, e parhanan shoco, kinikini, bula duifi, asina hopi otro tipo di parhanan; tambe e 5 tipo di bushi cu tin den e area aki y tambe e matanan manera waya-ca, druif y otronan, como tambe mangrovenan cora, cu ta proteha mescos cu e bushi y otro mata y parha.

E bushi y cueba mas band'i pabou bay ariba a sufri daño inmenso: a tapa y kibra tur e cuebanan, como tambe a kibra y mata hopi bushi protegi pa ley ariba e tereno cu a wordo rosa. A laga hopi bushi di diferente tipo benta tur caminda ta muri, cu na e area aki so bo ta haya esakinan.

Tristo pa mira con nan a rosa matanan proteha pa ley, cuebanan tapa y otronan destrui y na unda un di nan tabata neishi di un pareha di shoco. Nos a publica tur esakinan anteriormente den tur corant y ariba nos Facebook, pidiendo gobierno pa no destrui e area aki y toch Minister Otmar Oduber a duna orden, hunto cu Gobierno y cu ayudo di Gobernador – cu ta



pro proteccion di naturalesa, mescos cu Minister Rudy Lampe y Luigi Bergen – pa toch laga nan destrui e area preserva aki.

Lampe y Bergen durante Race Track a forma parti hunto cu Fundacion Accion Ambiental den e plataforma Aruba Dushi Tera pa stop e Race Track y pa no traha nada cu por haci daño den Sero Colorado na e areanan preserva marca ariba e mapa di Sasaki Plan 1997, na unda tambe e tempo ey Marisol Tromp y Nilo Swaen y otro miembronan di MEP a haci un caminata di protesta

pa no traha hotel; awe ta nan mes ta pro hotel y destruccion di e area cu tanto nan mes a protesta.

Nos ta spera cu ainda nos Gobernador, cu ta pro proteccion di nos naturalesa, por haci algo pa stop e daño grandi haci y tambe UNESCO Aruba, na unda balornan natural, ecologico, historico y cultural ta prioridad.

Ta un NGO so, Fundacion Accion Ambiental y Aruban Warriors como grupo a sali defende. Unda Stimaruba, Rainbow Warriors Int, FA-

NAPA y otro NGO ambiental a keda pa defende?

E area na unda e indjannan a habita tambe ta keda den peliger di wordo destrui. Unda esunnan concerni a keda, pa hunto cu nos defende e balor historico aki?

Fundacion Accion Ambiental ta urgi Gobierno y Minister di Infraestructura y Medio Ambiente pa para e destruccion na e area ariba e baranca panort di Baby Beach di inmediato, pasobra un bialha mas, no a cana e caminda correcto y nos ta pidi DNM para tur proceso pa sigui construi e hotel eynan y mirando e daño causa na e sitio, pa para esaki completo.

Ningun momento a menciona nada di rosamento y menos di boramento, cu ta extrictamente prohibi.

Den e contesta di e zienswijze ta poni cu lo no bay haci daño na e sitio y ta tene cuenta cu e parti ambiental y naturalesa, esta no ta bay haci boramento of cobamento y menos rosamento cu a wordo haci. E fout di mas grandi cu a wordo haci, di duna e inversionistanan e tereno prome cu a pasa e ROP 2019 y a pasa e ROP 2019 prome cu a contesta e zienswijze, cu tampoco ta cuadra cu realidad.

Fundacion Accion Ambiental ta pidi Gobierno pa para e proyecto di e hotel pa wordo construi ariba e baranca mas pronto posibel.

